

商水縣志

HARVARD COLLEGE LIBRARY
FROM THE
HARVARD-YENCHING
INSTITUTE
AUG 30 1929

ChL^T 3145.0 213.83

卷之八

誥敕

論記
引

疏序
詩

商水縣志卷之八

藝文志

諸敕疏

序

論詩

記

引

文章經國大業不朽勝專然子虛上林華而失實三都七發繁而寡要雖紙貴洛陽寃何裨哉若是則文之為文蓋可知也商本僻壤敢言著述乃

聖天子之德音與賢司牧之教令或褒表功德或董諭士民固煌如日星式若典型矣因表藝文

舊志

文所以載道也

易明陰陽書紀政

事詩道性情禮謹節文春秋正名分他如左邱明司馬遷載籍極博結體極古皆深於道者也後世

之文不逮古人遠甚然而郡縣亦莫不有文以占
風俗之污隆卜人才之盛衰商本無鴻才巨儒之
著作而舊志又成於

國初兵燹之餘故紀載者寥寥焉今雖加意搜羅殊多
未輯亦惟是

絲綸之汗渙鄉先生之傳記與夫學士文人之謳吟僅得
若干首大抵皆有關於風俗人心或者其幾於道
乎續而志之聊以備輶軒之採可也

誥敕

明贈鴻臚寺右寺丞王溢父王三母李氏誥

景泰六年

竊曰國家推恩臣下必及其親者所以重本而勸孝也
而何間於存歿哉鴻臚寺右寺丞王溢之父王三慶鍾
厥子而祿養不逮揆其所自宜有顯褒今特贈爾為承
務郎鴻臚寺右寺丞靈其不昧尚克承之

敕曰朕惟羣臣之才者固本於父亦必資母德焉存有
褒榮歿有追贈此有國之通制也鴻臚寺右寺丞王溢
之母李氏有子能官而不逮養溯惟所自宜錫褒榮今
特贈爾為安人尚克歆承永賁泉壤

明贈通政司左叅議王溢父王三母李氏誥

天順元年

制曰國家於臣下既有申命之榮斯於其親亦有加焉

爾贈承務郎鴻臚寺右寺丞王三乃通政使司左叅議王溢之父蓋常因子而推恩矣子今敘陞爾宜進秩特贈爾爲奉政大夫通政使司左叅議靈其承錫永賁泉壤

制曰孝子之愛其親靡有存歿之間也故朝廷推恩於臣必及其親所以體其心而敦孝道也爾贈安人李氏乃通政使司左叅議王溢之母旣因子受贈矣子今進官亦進爾之榮命特贈爾爲宜人幽壤不昧光賁無窮

明贈平鄉縣知縣王濬妻任氏誥

成化四年

敕曰民牧之責莫切於縣爲之尹者必得廉能勤慎之

士庶克有稱爾直隸順德府平鄉縣知縣王濬發身賢科擢居是職歷年滋久撫字勤勞宜錫茂恩以示褒典茲特授爾階文林郎錫之敕命爾其益盡乃心端乃守懋修厥職以稱朕養民之意欽哉

敕曰夫婦人之大倫朝廷推恩羣臣必及之所以厚恩意也爾直隸順德府平鄉縣知縣王濬妻任氏謹婦道以相其夫茲特封爾爲孺人服此恩榮永光閨闈

明贈太常博士王相父王榮母張氏誥

成化二十年

敕曰朕惟爲人子者孰不欲顯揚其親故朝廷於人臣効職者必推恩以報之所以遂其顯揚之心而勸天下

之爲孝者也爾山東濟南府武定州海豐縣致仕知縣
王榮乃太常寺博士相之父居官有年訓成其子推原
所自恩命宜申茲特封爲文林郎職如故服此茂恩益
綿壽祉

敕曰朕惟親之訓其子與子之愛其親莫不欲貴之故
褒崇羣臣而必及其親者所以示勸也爾張氏乃太常
寺博士王相之母慈忠之善著於閨內訓子有成宜推
褒典茲特封爲孺人服此茂恩永綿祿養

明贈大興縣知縣王懷衮父王徹母華氏誥

嘉靖二十一年

敕曰國家立考課之法制褒崇之典甄淑別慝推賢表

能甚盛舉也矧我京邑之臣厥考宰牧顧渥恩可後哉
爾原任山西平陸縣知縣王徹乃順天府大興縣知縣
懷衮之父禔身莊重賦性孝友粵自育才芹泮通籍桂
闈厚積深藏久矣古人爲配展也君子之儒旣乃出受
邑符未任而卒年不滿德良可悼傷顧其未盡之休發
於爾嗣揚芬紹美先後顯融傳稱德厚者流光揆此益
信是用贈爾爲承德郎順天府大興縣知縣於赫寵靈
永賁幽壤

敕曰古稱賢母淑德懿行載在史冊匪賴哲嗣以顯揚
之罔克表見於世爾華氏乃順天府大興縣知縣王懷

衮之母生有淑德來嬪令門慈惠每周夫姻族端恪動
協乎矩度用能相其夫爲時彥訓其子爲賢良追恤之
恩宜爾昭顯茲特贈爲安人誕示幽宅服此明恩
以上舊志

國朝

贈順天府霸州文安縣知縣郭天錫父郭國籓母王
氏妻王氏繼妻王氏誥
順治十八年

皇帝制曰資父事君臣子篤匪躬之誼作忠以孝國家廣
錫類之恩爾郭國籓乃順天府霸州文安縣知縣郭天
錫之父善積於身祥開厥後教子著義方之訓傳家裕

堂構之遺茲以覃恩贈爾爲文林郎順天府霸州文安
縣知縣錫之敕命於戲殊榮必逮於所親寵命用光夫
有子承茲優渥永茂忠勤

皇帝制曰奉職在公嘉教勞之有自推恩將母宜錫典之
攸隆爾順天府霸州文安縣知縣郭天錫之母王氏壺
範宜家夙協承筐之微母儀詒穀載昭畫荻之芳茲以
覃恩贈爾爲孺人於戲彰淑德於不瑕式榮象服膺寵
命之有赫永賁泉壚

皇帝制曰錫類推恩朝廷之大典分猷亮采臣子之常經
爾順天府霸州文安縣知縣郭天錫職任花封才堪良

吏清廉克彰乎庶事慈惠允著於當官慶典適逢新綸
用賁茲以覃恩授爾爲文林郎錫之敕命於戲宏敷章
服之榮用勵靖共之誼欽茲寵命懋乃嘉猷

皇帝制曰恪恭奉職良臣旣殫厥心貞順宜家淑女爰從
其貴爾順天府霸州文安縣知縣郭天錫之妻王氏含
章協德令儀夙著於閨闈勉同心內治相成於夙夜
茲以覃恩贈爾爲孺人於戲龍章載煥用褒敬戒之勤
翟弗欽承永作泉原之賁

皇帝制曰臣子敦服勞之誼典旣錫榮婦女嗣淑慎之徽
恩宜並茂爾順天府霸州文安縣知縣郭天錫繼妻王

氏素嫻內則動協女箴相夫載著勤勞宜家克彰令譽
茲以覃恩封爾爲孺人於戲蘋蘩繼媿式揚彤管之徽
綸綍同褒勉贊素絲之德

贈千總管浙江紹興衛後幫領運千總事趙鳴謙父

趙映母李氏誥

康熙三十六年

皇帝制曰寵綏國爵式嘉閭閻之勞蔚起門風用表庭闈
之訓爾趙映乃千總管浙江紹興衛後幫領運千總事
趙鳴謙之父義方啓後穀似光前積善在躬樹良型於
弓冶克家有子拓令緒於韜鈴茲以覃恩贈爾爲武德
將軍千總管浙江紹興衛後幫領運千總事錫之誥命

於戲錫策府之徽章游承恩澤荷天家之休命永賁泉
壚

皇帝制曰怙恃同恩人子勤思於將母赴桓著績王朝錫
類以榮親爾千總管浙江紹興衛後幫領運千總事趙
鳴謙母李氏七戒嫻明三遷勤篤令儀不忒早流珩瑀
之聲慈教有成果見于城之器茲以覃恩贈爾爲宜人
於戲錫龍綸而煥采用答劬勞被象服以承休永光泉
壤

授千總管浙江紹興衛後幫領運千總事趙鳴謙妻

高氏誥

康熙三十六年

皇帝制曰區畫軍屯兵食聿關大計賢勞王事人臣實有
常經爾千總管浙江紹興衛後幫領運千總事趙鳴謙
展力戎旃留心武備伍符策籍能備簡閱之規輓粟飛
芻具展精勤之績克彰前効用沛殊施茲以覃恩特授
爾階武德將軍錫之誥命於戲無忘介冑之勞祗承異
渥式荷絲綸之寵益布新猷

皇帝制曰策府疏勲甄武臣之茂績寢門治業闡賢助之
徽音爾千總管浙江紹興衛後幫領運千總事趙鳴謙
妻高氏流質名閨作嬪右族擷蘋采藻夙彰宜室之風
說禮敦詩具見同心之雅茲以覃恩封爾爲宜人於戲

錫寵章於闈闈惠問常流荷嘉獎於絲綸芳聲永劭

贈候選知州李震普父李蘭禧嫡母金氏繼母宋氏

母鄧氏誥

雍正十二年

皇帝制曰興孝維君錫類弘昭報本教忠自父義方敬用承家爾李蘭禧乃候選知州李震普之父道在禋躬爰被絲綸之重志存作室式宏堂構之遺茲以爾子克襄王事贈爾爲奉直大夫候選知州錫之誥命於戲恩逮所生彌表象賢之美榮施下壤益彰燕翼之庥

皇帝制曰疏恩將母廣推錫類之仁移孝作忠均切顯揚之志爾候選知州李震普之嫡母金氏愛子能勞篤義

方於杼軸相夫克順端令範於閨闈茲以爾子克襄王事贈爾爲宜人於戲象服昭榮聿荷廷綸之寵熊丸遺教永流泉壤之輝

皇帝制曰劬勞罔間者鞠子之深恩褒恤維均者勸忠之大典爾候選知州李震普之繼母宋氏相夫必敬克嗣乎前徽勗子成名不殊於已出茲以爾子克襄王事贈爾爲宜人於戲承明命之有赫寵被華綸昭德音於不瑕榮馳黃壤

皇帝制曰宏恩溥浩蕩於班聯孝子念劬勞於鞠育必推榮自出斯惠訖靡遺爾候選知州李震普之母鄧氏字

秀旺英茂啓徵蘭之北懷謙履肅承襄畫荻之風茲以爾子克襄王事贈爾爲宜人於戲體隨榆翟俱輝名以絲綸增重欽此榮寵益勵貞慈

封候選知州李震普妻陳氏誥

雍正十二年

皇帝制曰國家推恩而錫類臣子懋德以圖功懿典攸存忱恂宜勗爾候選知州李震普秉質純良持躬恪慎才堪任職夙懷篤棊之誠志切在公早著敬勤之誼旣彰義問宜沛新綸茲以克襄王事特授爾階奉直大夫錫之誥命於戲式敷車服之榮用勵顯揚之志尚欽寵命益矢嘉猷

皇帝制曰靖共爾位良臣旣効其勤黽勉同心淑女宜從其貴爾候選知州李震普之妻陳氏克嫻內則能貞順以宜家載考國常應褒嘉以錫寵茲以爾夫克襄王事封爾爲宜人於戲敬爲德聚實儆戒以相成柔合女箴愈著匡襄而永賚

贈候選通運判李郊父李桂芳母張氏生母于氏誥

雍正十

二年

皇帝敕曰資父事君臣子篤匪躬之誼作忠以孝國家宏錫類之恩爾李桂芳乃候選通運判李郊之父善積於身祥開厥後教子著義方之訓傳家裕堂構之遺茲以

爾子克襄王事封爾爲承德郎候選通運判錫之敕命於戲殊恩必逮於所親寵命用光夫有子尚宏佑政益勵忱恂

皇帝敕曰抒悃奉公嘉教勞之有自推恩將母宜錫典之攸隆爾候選通運判李郊之嫡母張氏壺範宜家夙協承筐之媿母儀詒穀載昭畫荻之芳茲以爾子克襄王事封爾爲安人於戲彰淑德於不瑕式榮象服膺寵命之有赫益賁徽音

皇帝敕曰忠以孝成臣子篤顯揚之志母從子貴朝廷大不置之恩爾候選通運判李郊之生母王氏柔協女箴

勤襄內治茂啓徵蘭之兆善承畫荻之芳茲以爾子克襄王事封爾爲安人於戲象服煌煌酬勤思於五夜龍章奕奕揚淑德於千秋

封候選通運判李郊妻劉氏誥

雍正十二年

皇帝敕曰錫類推恩朝廷之大典奉公効力臣子之常經爾候選通運判李郊賦質純良持身恪謹忝服官之奏績先報國以抒誠忱恂克昭新綸宜賁茲以克襄王事授爾爲承德郎錫之敕命於戲式敷章服之榮用勵靖共之誼欽茲寵命懋乃嘉猷

皇帝敕曰恪恭報國良臣旣殫厥心貞順宜家淑女爰從

其貴爾候選通運判李郊之妻劉氏含章協德令儀夙著於閨闈黽勉同心內治相成於夙夜茲以爾夫克襄王事封爾爲安人於戲龍章載煥用褒敬戒之勤翟弗欽承益勵柔嘉之則

贈候選州同李銘父李羽國母崔氏誥

乾隆二年

皇帝敕曰資父事君臣子篤匪躬之誼作忠以孝國家宏錫類之恩爾李羽國乃候選州同李銘之父善積於躬祥開厥後教子著義方之訓傳家裕堂構之遺茲以爾子克襄王事贈爾爲儒林郎候選州同錫之敕命於戲殊榮必逮夫所親寵命用光夫有子尚宏佑啓益勵忱

恂

皇帝敕曰奉職在公嘉教勞之有自推恩將母宜錫典之攸隆爾候選州同李銘之母崔氏壺範宜家風協承筐之媿母儀詒穀載昭畫荻之芳茲以爾子克襄王事贈爾爲安人於戲彰淑德於不瑕式榮象服膺寵命之有赫益賁徽音

封候選州同李銘妻趙氏繼妻劉氏誥

乾隆二年

皇帝敕曰錫類推恩朝廷之大典奉公盡職臣子之常經爾候選州同李銘賦質純良持身恪謹佇服官之奏績先報國以抒誠忱恂克昭新編宜賁茲以克襄王事授

爾爲儒林郎錫之敕命於戲式敷章服之榮用勵靖共之誼欽此寵命懋乃嘉猷

皇帝敕曰恪恭報國良臣旣殫厥心貞順宜家淑女爰從其貴爾候選州同李銘之妻趙氏含章協德令儀夙著於閨闈黽勉同心內治相成於夙夜茲以爾夫克襄王事贈爾爲安人於戲龍章載渙用褒敬戒之勤翟芾欽承永作泉原之賁

皇帝敕曰臣子敦服勞之誼典旣疏榮女士嗣淑慎之徽恩官茂錫爾候選州同李銘之繼妻劉氏素嫻內則動協女箴相夫載著勤勞宜家克彰令譽茲以爾夫克襄

王事封爾爲安人於戲蘋蘩繼媿式揚彤管之輝綸綽同褒彌表幽潛之德

贈廣西桂林府全州吏目王庭堅父王寬母魏氏誥

乾隆
六年

皇帝敕曰設官分職昭器使之無遺錫類施仁嘉蒙恩於伊始爾王寬乃廣西桂林府全州吏目王庭堅之父秉心醇朴飭行端方教誨懷式穀之勤政事本貽謀之善茲以覃恩贈爾爲登仕佐郎廣西桂林府全州吏目錫之敕命於戲一命得以逮親遂膺曠典庶政期於稱職永荷榮光

皇帝敕曰登皇路以馳驅忠原本孝入庭闈而侍奉嚴必
兼慈爾廣西桂林府全州吏目王庭堅之母魏氏性本
和柔飭矜肇於閩內教惟勤慎紆章服於庭前茲以覃
恩馳贈爾爲九品孺人於戲所親邀優渥之恩勉圖懋
績有子効靖共之誼永表芳型

道論

明知縣劉遷

至道無他岐也亦無不貫柰之何有異端也竊儒之
真而與吾儒角又柰之何吾儒之弊也襲儒之迹而
反爲異端所賸何也周末大道旣隱吾尼父始生與
其徒闡道於洙泗以四母開道學心傳若坐忘若集
義諸賢是皆深詣聖學獨步道岍而道統昌矣嗣是

商水縣志 卷之八
儒術大行業儒者國君用其言卽尊顯其身相沿旣
久道真旋失學佛老者倡爲持戒入定黃白苦空之
說而各立門局吾儒自屈首受書卽沉溺於糟粕以
爲富貴媒比通仕籍復沉淪於名利盲乎莫知有道
且以道爲迂宜其來下士聞道大笑之譏也其高者
不過馳騁詞賦輒以爲斯文在茲而結黨誇詡他不
復問甚高者則又叛之而高談苦空右視黃白何羣
世人而胥趨於異也然異端非操異說以贖我其所
謂空也竊四母其所謂入定也竊坐忘其所謂持戒
也竊集義之說人奈何反棄此而取彼亦未思人性

此性盡性則人事已畢何事苦空黃白爲哉世傳心
經道德諸篇爲佛老口授亦何嘗譚及如此其爲其
徒之竊吾儒而與儒角也明甚世儒猶然顛冥之
不過以長生久視說爾不知苟聞道也卽長生而
非計將卽捐棄而非物故不卽浮沉歲月雖壽於旗
翼奚益也况數有一定卽天地或不能逃雖緇衣黃
冠之徒亦以屍解涅槃之說而文其物故矣安有久
視長生之理語二殤子非夭老彭非壽要之亦各安
於數而長生何爲哉列子云生之不得不終也卽物
之不得不生也終於此者安得不生於彼生於彼者

商水縣志 卷之八
安知不贖於此又安知今之營營而求生者非惑乎
此語雖不可訓亦有味乎其言之余非深於聖道亦
嘗博極羣書潛心玩味恍見四母爲聖人盡性之學
而母意尤爲四母關頭且悲見世儒胥淪溺於異端
與詞賦名利而失其本真也故著爲論而端其嚮往
焉

記

元

重修宣聖廟記

汝陽縣尹兼管本縣奧魯勸農事

趙璉

聖人之道猶日月運行於天亘古今萬世無間也周

衰跡熄火於秦章句訓詁於漢詞章於晉魏隋唐道
固自若而所寄微矣宋大儒繼作能明聖人之道以
寤後之學者著書立言旣精旣備我皇元以武功定
天下誕敷文治自京師至郡邑咸置廟學建立師生
俾人知所教而不忘其教之所自於以淑人心厚風
俗以成盛治作新振起責之守令不專於掌教者法
然也天下之爲郡若州縣能奉承法意以無負其責
者有矣未有掌教不專其責而能自以爲責者也襄
城張君鵬南冲霄初教諭於克稱厥職至順元年
冬十月乃官商水縣學學有田豪右鄰其南者久侵

奪之君言於縣明年春達魯花赤塔察兒仲安暨縣尹劉潤夫覈實歸諸學仲安等既代反反實監是邑與縣吳士宏克廣主簿潘繼祖茂先者復門之西南隅故地強悍者心服繇君之請也一日君又以葺學宮爲請且日以王宮正室邇臨通衢爲神之棲於以昭文治妥聖靈難矣爰度地宜得亢爽於其北集邑賢士大夫而經始之衆懽趨焉不期月而告成厥殿巍然厥廡翼然像圖孔儼式瞻以敬講經有堂肄業有齋門戟森列庭檜駢植給閒田以供祭祀廩師生靡有厥遺今則已矣其所建立或摧圯而弗支漫漶

而罔飭曷一新之監邑令簿俱愀然曰法國吾責也敢捐已俸以倡於是吏民爭相爲助功既奏起摧圯爲堅完易漫漶以明麗作始于季春三月而成於其冬之十二月甲寅士獲所歸民不知役代茂先而終其事者主簿王從善君美也落成張君躬輦石西山走汝陽謁記於璉璉惟聖人之道載在方冊漢唐諸儒雖或章句訓詁未有恬然如宋程朱之學集厥大成者皇元設科經術率本程朱將使教者知所以教學者知所以學而不惑於他岐也商邑廟學旣已復矣師生居有處食有廩矣作新振起之責可謂塞矣

尚相與激揚導勵講程朱之學明聖人之道以無負朝廷立法之美意而後可今夫爲縣而能奉承法意不負其責斯固賢矣掌教而自以爲責卒能有成者豈不爲尤賢哉矧監邑及及君嘗與愚共事祥符令尹先君彥歺與吾祖松澗公同官南臺張君又同里開何敢辭故書以爲記俾歸而刻諸石

明

儒學甘泉記

河南提學道

劉昌

商邑儒學故有井苦人不食教諭何璞爲桔槔以出其滿而盡加淘滌焉而泉涓涓水復至井復盈則復

出之而泉亦復來日漸甘如是者累月乃始食凡以羞神明享賓客悉需於是而日汲益衆於是知縣羅楫作亭井上且礪石以俟作記予提學至商遂與璞率學之諸生請予記其事予因進璞而問之曰當井之未食也何如曰蕪穢交蝕而臨滌者不力汲者不至益而不流而日以費焉耳又問曰其旣食何如曰泉之出旣甘則其用益廣而汲者不止出者不竭時甚賴之嗚呼此養才之說也乃進諸生而謂之曰諸生譬之井矣夫惟自棄則人亦棄之能日與師友居以反身修德亦何所用而不可是故游息於學猶井

之託於地也其俯仰於詩書載籍之間以充其所知猶井之加淘渫也勤勵不息至於天理日明人欲日消猶泉之出其故而來其新也由是而致之用以齊家治國平天下擴乎其無滯礙焉其久且遠者猶井之以羞神明享賓客而無乎不需也雖然井既爲人所食爲用在於淘渫之功則璞之此舉要爲知本其教諸生有不待言而意已獨至者諸生勉之哉易有之曰井渫不食爲我心測則是反身猶未盡也勉哉諸生勿自爲棄井則庶矣皆應曰諾遂書以爲記俾相輔而進焉

重修城隍廟記

知縣陳鵬撰

商水縣城隍廟建在治西數百步其址深邃而簡靜爽塏而宏敞蓋據山川之勝鍾輿圖之靈者也廟貌森嚴感應捷速凡水旱蟲螟疫厲災沴禱之必應禦災捍患視他邑獨神故商之士民特尊崇之廟建自有邑之始歲序遷流風雨漂搖椽橈題多所損壞殆有不若其初者鄉民王珍張學等恐其不足以安神靈而迓休祉也謀於衆請於余而重修葺焉余以斯神保障茲土陰主福善禍淫之柄與余職實相表裏因可其議而出示以諭之曰願修廟者聽於是擇

商水縣志 卷之八
七月廿四日之吉鳩工聚財撤故易新不踰月而輪
奐美不徒爲觀瞻之壯實足爲風雨之除神靈妥而
休祉不於是迓乎事旣竣商人士屬余言以紀其事
余不佞忝有一日政教之責乃颺言曰夫廟神明之
舍也敝壞焉則知舉而新之以爲安神迓休之地矣
至於吾人之心實神明之府入德之基凝福之地也
稟受於有生之初明而通公而溥未始有一物之雜
存之以宰萬事出之以應百爲招休祥而來百順由
此其選也前此無有乎不新矣迨乎形生神發物感
客交汨之以利欲之私奪之以攻取之累明者晦通

者塞公者私溥者隘而神明爲之不守矣由是禍患
之招災害之致有不可勝言者曾不知修之以爲安
神迓休之地此何故哉殊不知修廟與修心事本異
也而理則同神與事心迹雖殊也而道則一若等
以修廟之誠爲修心之道以事神之敬爲事心之功
則明通公溥存神妙應而天下之理得矣若等何明
於彼而暗於此乎邑人士聞而謝曰命之矣因鐫諸
石以紀其事云

國朝

重修玉皇觀碑記

知縣張鉞撰

日明日旦胥在覆幬之下何人不當事天何日不當敬天而郊焉而格必歸之九重之聖人下此者不得舉行其得舉而行之者又未知能格焉否是知分不可僭誠不容僞禮與理然也帝者天之主宰而舉世稱爲玉皇因道家昊天金闕之說也且從而像之夫可得而像像而如見之者必其秉二氣五行之秀躬有令德沒爲明神生何代居何地靈爽何狀人思之弗諼爰摹而垂之永永其貌之肖不肖固無論也帝則豈同血氣之論受形於宇宙有姓名時地之可稽又豈以瑰奇之跡震蕩人見乃以搏削髹繪範其

官骸施之彩碧被以冕服建祠宇而奉焉俾氓隸婦稚咸得禱謁而不限以時此不待知者而知其無徵於禮不察夫理者也雖然人無日不戴天無日不知天之爲帝而泄泄然幾於忘之則以清虛寥廓未見有鑒茲而臨於其上者卽欲敬事而無由也若夫矮巷之間磚甃數重廣袤以深均不及尋丈其卑隘不容俎豆製土木尺許號之曰神則人見之而心凜矣傾城辦香或牲酒祈佑進而郡邑嶽瀆之祀與凡衆祠百物謂其各有專司於真真者神倍尊人見之心亦倍凜况夫極之於帝尊莫與京瞻拜之際卽至愚

不肖有不肅然以恭竦然以懼者乎斯時也爲善之心不覺自萌爲惡之心亦暫而息矣然則今天下之稱曰玉皇而像之不可謂其意不本於敬天而欲勸善而沮惡也郭東里許故有玉皇閣明隆慶初邑民顧珠所創建閣之前後暨兩廡屋凡若干楹列若干像自玉皇而下多祀明神兼崇二氏又作書院若干楹以待來學者買地庀材工費頗鉅其詳具蕭君所爲記中閱時旣久漸就圯剝道士吳清元募而重葺之制無減於昔惟所謂書院者無存焉經始於壬辰仲冬閱五稔迄戊戌孟春而告竣祈文於余余嘉珠之意而多住持與諸襄事者之功不以不文辭舊額曰玉皇閣三官殿碑記今不列三官者統所尊也書而俾勒諸石

建修義學碑記

知縣 張淑載

灑川密邇淮陽古稱名勝之區自我

朝定鼎以來德化翔洽一時人文蔚起較昔尤隆而因材造就非建立義塾不爲功是以天津王公夔龍於庚戌歲攝篆茲土卽議建立義學遂捐貲售地庀材鳩工爲營繕計未幾以調任中止潼川牟公繩祖繼之建藏書閣講堂各一功未竣而解組越半月而余

來尹茲邑既下車與聞兩公育材雅意歎其爲政能
急先務遂殷殷欲步後塵然事皆未就緒工程浩繁
兼以初登民社簿書叢集無暇及此踰一載乃得謀
於廣文束君束君告余曰此盛德事大有造於商者
也公第先爲之倡擇日興工風行草偃理之必然况
紳士向嘗太息王牟兩公盛心未遂某當會二三僚
友竭蹙倡捐人之好善諒有同心余然其言捐貲擇
日屬庠士中之曉事練達者王廣運王鳴岐兩人監
修而以束君董其成一時紳士咸踴躍從事量力樂
輸於乙卯夏清和之十有八日興工至乾隆丙辰四

月告竣凡昔之所已建而工未就者補之如藏書閣
講堂是也昔所未建者增之如東西齋房儀門大門
四維之墻垣是也於此聊加潤色規模粗具復爲之
購經史古文若干卷鑄大刀一口十二力式弓一張
試石一塊置其中延師設教俾文武生童之來學者
不慮誦習之無地師資之乏人切廟漸漬之久將處
爲名士出爲良臣賢才起而風俗淳庶王牟之志可
慰而余或可塞責於厥職歟後之君子蒞斯邑者均
有造士之責因其基而擴充之使義塾永新而人文
日盛焉是余所厚望也夫

義學修脯捐資碑記

知縣 李新猷

書院之設原以教育英才俾成人小子共底於有德
有造之域以爲我

國家棧樸菁莪之助也戊午春余由滋陽學官來尹茲
土知澉川書院爲前令王公夔龍牟公繩祖張公淑
載建內講堂五書樓三左右齋房六門墻厨竈具焉
厥地之宜可容學子數十人而且黌宮臨其北東奎
閣峙其東南風送荷香襲人衣裾余徘徊其間深幸
作人之有地顧以乏修脯資師友缺如爲可惜也會
邑紳李震普慨捐百餘金始得師友一堂有所指授

木幾震普及其介弟震興與堂弟郊堂姪樹勳歲捐
百金以佐余所不逮教育之賴以不廢者閱三載矣
顧歲歲議捐事難經久辛酉夏聚邑紳士謀所以爲
經久計者余捐俸五十金以爲倡紳士皆翕然樂從
計捐六百七十有五金請於上官給典商生息每
歲應入百二十兩有奇以作修脯之資諒不至於匱
乏余復捐修門房三間招蒼頭居之司啟閉供掃除
一切器用無少缺焉從此延師授徒肄業其中余得
於簿書之暇時加考校將文風丕振英賢輩出誰謂

聖天子興賢育才之化不下逮小邑耶憶余秉鐸滋陽時

商水縣志 卷之八
樂與士子講道論文一時從遊者接踵而至歌鹿鳴者十有一題雁塔者四英英露爽次第而青其衿者指不勝屈然則商之人士造就於書院中者詎無春華秋實蔚然可觀者出而備一時之選歟則卽以今之商水作昔之滋陽觀何不可哉雖然猶有慮夫作人固貴有善地而整飭不能不待乎人詩不云乎靡不有初鮮克有終亦事之未可料者爰撮其始末勒之貞珉以告後之尹茲土及紳士之生長於此地者又焉知來者不且踵斯舉而光大之耶是爲記

重建玉帝閣記

邑庠生 郭調元

余聞之惟仁人爲能享帝禮冬至祀於圜邱自生民以來郊焉而天神格者必歸之九重之聖人是事上帝者必以其時以其地且以其人不然則已僭不知始自何時而祀天之事下逮氓庶普天率土罔不建立閣廟第不知享祀豐潔上帝歆之否也迺且循爲故常君子亦不謂其僭而厚非之豈緊無說蓋人日在天之下幾不知有盥茲而臨於上者浸浸而人欲肆天理滅矣一觀帝宇之輝煌天威赫赫而其志凜然而其貌肅然雖有非心佚志亦將畏憚而莫之逞玉帝閣之建或亦此也唐鎮廟有玉帝閣上有玉帝

列天官地官水官之像詢其始建父老無知者諸神廟左右環列帝閣隆然居中其非近代法物亦明矣明末寇盜蜂起土人因其形勢戮力修寨攬城固守賴此閣爲之捍蔽云歷

國朝七十餘載風雨烏鼠之摧敗頽敝已極岌岌有將覆之勢會首姚宏喜張朝用等化主高乾住持李一純日擊心怵慮無以示威重肅觀瞻也因糾合同志彷彿舊制而重建之不期月而落成并神像爲之一新焉行見士民之行過是閣者皆凜凜有上帝汝臨之思則是閣方有補於斯世斯民而僭與不僭固不論

也是爲記

重建鍾鎮倉關帝廟記

郭苞

地名鍾鎮不知昉自何時其左偏有關帝神祠在焉及閱縣志恍然知斯地之所由名且以悲帝君之志之未就也當蜀漢後帝炎興元年魏遣司隸校尉鎮西將軍鍾會大舉入寇渡河南下駐師於此後人踵其遺事因名其地曰鍾鎮云予想夫三國鼎峙曹魏北據中原先主跨有荆益帝君與會分事二主當是時也非魏併蜀卽蜀吞魏丞相亮所謂漢賊不兩立者也帝君始識先主於草莽卽慨然欲舉中原而擴

清之收高光之大權而還之先主其志念深矣迹夫
樊之役帝君蹙曹仁於危于禁就擒龐德授首餘威
震乎華夏豈不足以奮曹瞞之魄哉使天祚炎劉帝
君克成大功則雍梁幽冀盡歸赤帝彼鍾會其人直
鞭箠使之耳方且不敢下江漢之馬何由走平陰抵
劔閣且又何由駐師於斯地哉余嘗憇帝君之祠憑
弔往古慨然思此地之所由名不禁抵徊太息因以
悲帝君之志之未就也抑又有說鍾會設謀動衆戕
民鋒鏑自謂不世之功身未受賞先赤其族帝君英
靈應爲含笑徒留駐師之名至今掛人齒頰若帝君
大節昭昭炳如日星雖大功未就而千古凜凜有生
氣生而爲人歿而爲神固其宜也豈鍾司隸所可與
之較長短耶土人立廟於茲或亦有感於斯夫積年
久遠風雨頽壞監生郭敏宇等及住持僧某目擊心
傷糾合附近居民共出貲財改建而重新之落成後
欲勒石以垂不朽因索記於余余思此地之所由名
未必無因也錄是以爲之記

重修高祖祠碑記

邑恩貢生

郭苞

自古在昔先民有言凡有功德於民者必百世祀之
所以示報也潞川縣治之西南四十里許地名曰唐

鎮廟詢之老人曰高祖祠也其言多不雅馴縉紳先生難言之夫高祖以匹夫崛起豐沛握赤符斬白蛇提三尺劍誅無道秦其入關也除秦苛政約法三章與民更始迨文景之世比隆三代豈非其垂統者善與廟祀千禩固其宜矣顧茲地非都邑閭閻氓庶上祀先皇者以爲非宜是又不然蓋嘗披覽輿圖考之史冊當其受命懷王牧馬秦關義旗西指固嘗屯集斯地而士民安堵雞犬無驚寬大之恩易見于倒懸之日故其地之民感其德指其地曰此我高皇帝駐蹕處也建廟而祀之以誌不忘亦人情報德之所

宜然也夫思召公者愛甘棠德高祖者憶所經故余疑唐鎮之名未必非爲棠爲唐而世遠年湮不得不以疑傳疑云爾茲廟也自漢及今幾二千年前之增修者不知幾人而相輪折缺殿宇摧頽又見於今茲甚非所以崇德報功之意也居民王楨斫成禮等各捐貲財共勦盛事落成之日礮高亭之石而俾予爲辭因書數語以爲之記

重建玉皇閣記

邑貢生

黃修性

村東玉皇閣由來舊矣前朝盛時閭左殷富歲時伏臘鄉人之祈報者靡不牽羊獻醴奏鼓吹竿以答靈

貺父老猶能傳其遺事焉辛巳壬午世變滄桑中原
鼎沸兵燹之餘祠宇日圯而住持者亦相率亡去曩
昔之盛遂成往事王君諱某者惻然念之倡議重修
會衲僧某來棲於此雅稱同心歷四十餘載而廊廡
寮厨椽楹櫺檻次第修葺是閣重建於丙戌之秋輪
奩塗獲煥然維新蓋較前爲愈盛云嗚呼天下之變
遷淪毀豈皆積劫之不可救耶盛極而衰衰極而復
盛陰陽消息之理所固然也恃有人焉以倡之而後
衆志以奮廢者以興不獨一閣爲然也然天下之變
遷淪毀終於不可復者若驪山之館太液之池封君
世家之宮室園陵亦已多矣會不得如是閣者重而
新之此閣與人所以可並傳不朽也興言及此感慨
係之矣

古埂碑記

邑人 程文耀

縣治西鄙交華邑界有古埂一道南北橫亘迤邐若
長坂然人共知其非水道久矣至埂西有戴家窪形
如釜底天造地設固從來積水之區也乃華邑人久
欲徹窪水以圖耕種遂假淨溝捏控開渠不奉關會
擅闢古埂竟使兩邑封疆頓成沙渚鄰人膏腴險爲
澤國情理旣乖構訟滋起自戊申以及癸丑歷年六

公驗九官更十七前後勘奪現有成案批填批修若
合符節尋經河道批委陳州兩行親勘其實詳覆遂
蒙上允檄飭華民將所控新溝盡行填塞所闢古埂
立爲修築而數年之案于是乎結此非一人之慶實
兩邑之福也但慮歲序乘除往事易湮一時泯迹姑
博長厚之名百年無傳徒滋釁隙之構爰勒於石以
垂不朽庶乎世世子孫服疇食德鄰邑姻婭一視同
仁將鼠牙雀角之端息而媿睦任恤之誼敦胥在此
一碑矣顧碑不建於埂而置之寺中者無他亦以記
敘不誣實望羣神共鑒云爾

雍正十年季冬譚莊地方居民程文耀等公稟官立
碑於焦城寺內

募改北門小引

懷慶府知縣署縣

劉元聲

余攝商政改南門從民便也仲冬磚橋成門雖已闢
工尚未竣邑人士交相讓焉民情士氣迥然爲之一
變已而邑之父老復有改北門之請嗚呼惡曲而好
直商之民情大可見矣余甫至商觀其城池地勢卽
欲盡變其四門之制恐拂民情未敢強以所不欲今
旣大同可盡改之以復其舊然相其緩急南與北尤
其所宜先者余因之有感矣自明季以迄今茲民情

之抑鬱未遂士氣之屈曲不伸未必非城門之曲階
之厲也七十載豈乏循良而因循苟且是誰之咎歟
余雖五日京兆期以不便於民者盡除之便於民者
盡興之靳勿負上憲委署之意而改門猶其小焉者
也故復捐俸以爲之倡與南門次第觀厥成焉

捐置隍廟香火田疏

知縣 張崇樸

竊惟春祈秋賽先王本神道以設教貌肅心誠奕禩
昭祀典以明敬周官嚴掃除之令侑妥神靈祭法載
蒸嘗之文上報功德維茲

城隍實爲一邑之正神允作兆民之福蔭禦大災捍大

患爲

國家固圉維疆鑒其過賞其功佐王政化民成俗顧靈
感聿昭神鑒而供奉宜善人謀乃茲廟祝道會司

某

資生乏策餬口偏窮三餐無餘何處覓青精之飯半
菽不飽安從煮白石之甘收日月於壺中爭道黃冠
辟穀盪雲霞於胸次定知丹竈無烟三氣難吞三尸
未去交梨火棗誰與贈幽逸之人槁木死灰誠哉享
清淨之福將使石爐香冷祠宇塵封荒草盈堦古樹
夕陽禽鳥亂積埃滿案秋風夜月鼠狐號旣已斷火
絕香得無神恫鬼怨凡我紳士量力捐貲少置薄田

商水縣志 卷之八
三
數畝聊當仙瀆一甌不難積少以成多全賴衆擎之
易舉從此三秋稔秔都成玉露瓊漿十畝菑畝盡是
芝田石髓佇見精神滿腹自將竭誠供神還看香火
盈祠何須沿門持鉢神人胥慰福量無邊謹疏

續纂縣志後序

王 兌

夏后敷土貢金九牧鑄鼎象物豈直辨神奸使民不
逢不若哉良以東西朔南車書雖同風氣固殊焉山
川險易道里遠近田賦高下一一勒更垂諸永久繼
起者可考而知也厥後太史採之則有風列國紀之
則有史郡縣裁之則有志志也者所以別剛柔考貞

淫仰觀天俯察地而中悉人情者也其猶列國之史
十五國之風九州之鼎乎商雖彈丸片壤前代亦有
乘載值兵燹之餘盡付煨燼則中原之殘毀商爲尤
甚矣

國初聲教四訖文德誕敷

大中丞賈公檄各屬修志以彰一代文獻之盛東萊
高公付其事於鄉先生郭君天錫時郭君尚未之任
偕二三同志力爲搜羅或訪之故老之傳聞或得於
宿儒之記憶一一揆剔分類纂集庶幾下邑文物不
至悉委草莽迨書成數年而舊志得自項城每以不

能盡載爲憾庚午歲

大中丞閣公合載全豫以宣文治上以黼黻

皇猷下以闡發幽光甚盛典也邑侯康公屬兌等數人而謀之草創未就而公以母喪去別駕劉公來攝是邑亦未就而去邑侯李公乃召而責成焉念才乏三長敢附立言之不朽第事同八郡豈云借才於異地竊幸斷簡復出又值新編尚存二三同人共取而校之遺漏者補荒唐者去既詳於前弗畧於後考設邑之由來稱名屢易沂河渠之源派爲害最劇鍾靈於地荒僻之區亦有傑士正氣在人閭里之中寧乏貞媛若夫踐土食毛征賦各有定制况乎九災七旱帝王亦遭凶禳務法春秋謹嚴之旨然三代是非之公廣爲採拾彙集類列求我公之筆削焉正其豕亥之誤易其句讀之舛庶獲附全豫之末知澉川葢爾其輿圖川流風土人士亦有可觀者焉商卽喬野無文際休明之代而得與於載籍之林亦可垂奕禩而傳不朽矣敬述其事於卷末

詩

明

慨道

劉遷

夫地不毀孔子貞以道火道不晦孔子貞以教奈何
老與佛鼎足立大造不知虛與無四母握真要若必
却榮與遺慮抑何偏於太元與孰與聽顯從晦因時
爲道治世則帝王編性卽佛老而體用無遺妙大哉
孔子先天無先後天無後囊括二氏主持宇宙譬大
明之經天而燭火難爲照嗚呼卽孔氏之徒猶高者
慕曠卑者遊糟竅不知獵華非真馳幻滋惑總之
裂中道

咏懷

知縣 姚文衡

承乏瀝瀝多事秋千戈四促動人愁拊髀每懷思頗

牧論文何暇較蘇歐偷閑一試全城畧得意先傾玉
殿甌願吐長虹驅魑魅掃清中土樂皇麻

國朝

激川八景

白帝清風

知縣 吳道觀

當年迷澤一身孤劍鏑蕭森起壯圖自是大風歌猛
士因留殺氣滿平蕪運移炎祚成灰冷嫗泣寒郊尚
夜呼無俟清秋來問月恍然濯魄在冰壺

焦岩晴烟

貔虎工羣擁沐西野橫兵氣曙光翳何時龍去狼烽

靖鎮日烏飛鵲影伍入望迷離和草碧待分晴霽半
雲栖時平常得烟繚繞願逐東風聽鳥啼

澗渡秋游

幽人何事盪蘭舟爲愛芳菲古渡頭日漾晴波搖嫩
綠風和夾岸枕寒流曾修土已蘭亭禊豈逐伊期溱
洧遊試問烏啼殘雨後扶筇攜榼幾多儔

銀杏蟠龍

物色曾經建武前滄溟倏忽幾桑田華開約畧桃三
月果碩依稀椿八千月映影移龍曲屈雲來枝似鳳
高鶩無端竊怪莊生語豈是無材享大年

烏溝夜月

晴霄是處仰清暉此地孤光覺更輝耳目不因歌舞
亂瑤華偏自靜幽肥微波影映惟魚躍皎魄陰凝漠
鳥飛回首西湖堤上望澹粧遮莫勝羅衣

荒城夕照

宋張輅墓田

四圍山色帶斜陽陵麓空濛汎紫光驅犢牧人歸唱
晚投林宿鳥倦飛長涼生漸覺炊烟淨野渡惟餘青
塚荒遊子不堪頻悵望數聲梟嘯怨垂楊

章華遺址

已緣槭杲賦祈招仍築崇臺傍野橋雖遜栢梁仙掌

商水縣志 卷之八
露却憐五祚翬飛霄如今蘿薜埋殘址誰復笙歌媚
舞腰含態却教無自恤行雲行雨幾終朝

梧桐棲鳳

潁川樹蹟固多奇累奏來庭有鳳儀陽翟飛遺紺翠
羽澗澗棲老碧梧枝好矜神爵成君意因諱祥鸞有
衆詞臺畔相傳苞彩異令人指點到今疑

白帝清風

知縣高理

劍氣橫荒野颼颼夏日涼大風歌一拍約法律三章
澤隱芝蘭秀天吹慶裔香人歸清淨國姬應化寒蜚

焦若晴烟

壯氣干霄斗千年吐紫烟畫籠驅犢笠夜罩罷漁船
禾黍連郊靄桑榆夾道邊英風長颯颯何處不瀾漫

澗渡秋遊

一帶如藍水源從洗耳來沿堤歌

帝力倚檝賦天才汎汎新涼月登登舊楚臺問民秋稼事

風雨賴鹽梅

銀杏蟠龍

巨跡開郅室奇踪應運留苔封濠客躡雲襯去人蚪
樹結如銀果河空若帶流秦松漢家栢代代有良儔
烏溝夜月

乘月眺東樓，薔花遍野浮。
水流疑曳練，茶響類人謳。
政簡民安臥，年豐吏出遊。
省耕溝血上，緩步不須騶。
荒城夕照

誰將百尺繩，繫此西飛旻。
返景不夜城，斜暉照赤堦。
薜蘿烟靄深，崦嵫赧彩側。
荒陴君子來，寸惜如金刻。
章華遺址

杳無車馬過荒址，徒淒然慨昔雄。
風日懸今禾雨天，誰能廢白雪。
祇有坐青氈，問俗經臺下，猶聞絲管喧。
梧岡棲鳳

噦噦如簫吹來，栖第一枝臺中。
知有鳳郊外，識無鴟

應德離丹穴，依仁耀彩儀。
不同凡鳥啄，遠上碧梧詩

白帝清風

邑人王珽

清風襲古道，曾記駐君鑾。
古碣荒村斷，平沙漠蹟殘。
勒驄憑壯魄，斬虺負峨冠。
凜凜千秋後，猶餘劍氣寒。
焦若晴烟

靄靄非陰雨，颼颼幾斷烟。
壑邱成往事，昭晦抑何年。
紫氣騰當代，煦光徹朔天。
祖今桑梓社，流水自涓涓。
激渡秋遊

且喜寧波日，乘時可暫游。
芰荷堪共掬，鷓鷯亦相儔。
歌汎中流檝，雲浮天際頭。
超然塵世外，宛似五湖秋

銀杏蟠龍

龍驤當代日鍊騎下雲林獨坐將軍樹同推召伯心
勒銘秦火斷駐跡漢松森矯矯荒臺側翻成古木吟

烏溝夜月

千載烏溝月猶疑今夜生光圓常皎潔魄晦亦分明
風雨寒林寺荒烟禾黍城登樓時極目無復漢家營

荒城夕照

極目平蕪靜長天綠水清古碑翻薄暮落日擁荒城
綽約暝連曙依稀雨帶晴餘光斂未徹復見月華生

章華遺址

勝蹟今如在遺名蓼水汀涵淵羣鷺啄聳漢孤鴻冥
沙市詢荆誌荒臺問楚靈一抔殘土土皓月映寒星

梧桐棲鳳

應運拂翬出梧桐棲鳳時章華鷺序端黼引朝儀
瑞氣干霄漢文明翼帝基至今懷彩翥何日復鳴岐

頌德詩

署教諭舉人

喬時傑

綠野伏龍作雨霖霏霏禾黍潤蒼黔薰風喜霽中天
月雅度嚴揮暮夜金案牘常閒看睡鶴蟬聲續斷聽
鳴琴冰壺皎潔清如洗自信無瑕對影衾

其二

荒城曠野水連陂瘠土殘蒼付牧司萬庶饑寒同凍
餒幾回日夜起勞思臨機斷決識虞詡計口茹蔬羨
子奇惠政百年昭

聖代無人不墮峴山碑

邑庠生 傅英敏

何幸來良牧詞篇出土論有氓開草昧無爨起烟村
風化維衰敝詩書訓弟舅共知循禮讓徧野樂雞豚

邑庠生 張養氣

豈敢空名譽德深賦誌書當厨塵甑滿清夜月梁虛
三惑曾除爾四知無媿諸霏霏時雨布膏澤遍澆廬

邑庠生 杜詠

丰儀温潤可人懷皎月清風映鳳臺他年花滿澗城
樹不亞河陽縣裏栽

邑庠生 王進賢

勵志清勤一布裾膏脂不潤孔君魚他年各選一錢
去不負生平幾句書

邑庠生 高用式

有政吟來易德深詠出難謏劣無能贅留取待青汗

府庠生 高巍

幾年移趾舊城阿道路時聞頌德歌切念鶴聲常寂

歷還期松影自婆娑鳳臺皎月橫秋漢銀杏清風拂
薜蘿共慶重開新雨露遙承天際沐恩波

邑庠生 張益讓

道範仁風時靄靄漫將仙履羨王喬茹蔬不厭居官
苦一種安閑意自饒

邑庠生 李璠

荒土勞民孤城如斗四野萑荊幾耕無耦我公茲來
樂彼南畝滿路歌謠黃童白叟賢哉賢哉民之父母

邑庠生 王兌

政和民無訟官署一僧廬幽伴惟白鶴案頭一部書

邑人 王珽

商邑地窪民貧兵燹之餘殘喘未息值年來差徭
繁雜水災疊至而以戊九月洪波連天何異堯年
汎濫凍餒比屋猶夫昔日情形恭逢我公高父母
於是歲十月之任首詢民瘼躬踐水鄉慈顏溫語
以慰窮黎因而感泣遂無逃亡之舉溝壑之虞矣
嗣後惻隱益篤清冰日著受賜深長無以為獻謹
修鄙詞以志不朽云

頌歌鄰國清激水峴山碑設濟同丁諷防隄擬杜詩
鶴琴聊自伴竹馬信童期重詠甘棠賦仁風共遠披

其二

皓月無雲蔽中天
永夜清藿藜充宦腹
堅白守荒城
德化洽農父
殷勤問俗情
無襦歌范暮
含哺慶餘生

其三

烽火馮陵後
荒涼澗水濱
歲飢耕稼少
隄決異災頻
凋敝逢循吏
釋懸育至仁
百年垂惠政
頓起物華新

其四

道路誰能禦
吟題出自然
依山無伏莽
解愠有歌絃
德厚孚三異
澤深戴二天
熙熙沐盛治
此日樂桑田

僑寓生員 陳元焜

焜本徽人寄籍沈庠托業商水伏見治內實心實
政近歌寧止遠賦樂郊有幹有年可以永世歷九
州而相將以懷此都也敬咏俚言以昭輿情以抒
積愆公道其不可掩夫

澗城渚水靜漣漪
澤溢流萍鷓鷖知
撫字無奇民帖
席憂勤有自政
匡時滿簾夜月松
陰冷兩袖清風竹
影移境內熙和煙
景好優悠敢托一
枝栖

仁壽篇

陳庠 江萬世拜頌

流火新涼秔稻香
非烟非霧慶雲翔
望仙門見麻姑
鶴賓日樓稱夸父
鴈豸澤土肥滋景
祚鼉磯雪浪硯

文章中有高人號石房芟荷爲冠薜荔裳手持方竹
秋昂昂雕龍綉虎壓長楊詩學陶家字寫王雲烟滿
載米顛航君不見當年蘇學士曾在丹臺尋石子尋
得石子養菖蒲九節九花能駐齒又不見平原厭次
東方朔兩足常常臨世濯詼諧吐納帝王邊蟬蛻不
因金馬濁知君潔操玉壺冰不愛官錢不受綾祝君
如山如阜如岡如陵如川之方至如日之恒如月之
升如南山之壽如松柏之茂無不承他年功崇德盛
勒鼎壘相將壽客袖桃來倒騎海馬上蓬萊一年雨
聽松風回

以上舊志

白帝清風

知縣 郭天錦

逐鹿縱橫事九州魚衣初困白龍遊青萍月冷秦宮
燼玉笋霜寒楚水秋澤畔應占雲氣現臺前共說寶
光浮荒煙古道傳遺址林木蕭蕭起暮颺

焦若晴烟

繞堞煙飛草樹齊長壕翠影落橋西依微曙色晴如
晦縹緲流光遠復低弱柳曾經懸葉臥叢花却自笑
鴉迷聞來野老渾無事徙倚濃陰醉杖藜

潑渡秋遊

泝水西迴此地分。澄空十里映秋芸。環渠浪隱浮鷗
靜繞郭波清落鴈羣。蘭漿歌來楊柳月。錦帆掉向楚
山雲。白袍供奉知誰侶。檀板金樽處處紛。

烏溝夜月

木樹重重月色移。輕陰吹斷晚風披。波沉素魄流銀
漢。練搗玉鈎掛碧枝。菱影遙憐魚沫細。迴翔共數鳥
歸遲。年年不改清光好。長待遊人拂釣絲。

晚望西陵寺

驛路春風晚西陵。駐馬看橫雲觸樹。合落日帶烟殘
草暗孤村靜。燈明一水寒。叢籬何掩映。應是雨花闌。

過鄧城

傍邑村居外。猶傳鄧子城。長河環野曲。弱柳薄堤縈。
井竈千門闕。桑麻百雉城。自從頗牧去。誰與細論兵。

南湖採菱曲

知縣張鉞

南湖八月長天色。採菱人逐湖光碧。蹙開細浪試蘭
橈。斜趁微風飛彩鷁。芳閣紅粧艷冶容。移舟爭近鏡
花叢。綠鬟低就搔首滑。皓腕舒將條脫鬆。鄰榜言笑
何晏晏。相逢猶疑曾相見。當日南薰碧冶中。芰荷葉
底芙蓉面。紅漬羅巾汗尚流。侍兒環向揮紈扇。珍重
朱顏白日留。等閒長夏清秋變。年年採蓮復採菱。惆

悵流光一擲輕。能保蛾眉似舊。非採菱歸去不勝情。
暮春步激水橋。抵玉皇閣。少憇。遇大風歸友人留
飲漫筆書懷

教諭 束裕

入歲時陰雨。因之懷抱惡。寂寞坐衙齋。三月鮮娛樂。
會當春欲歸。散步出東郭。同遊有友生。興致復不弱。
不于步履間。至止玉皇閣。閭然無一僧。頓令失歡噱。
欲訪秋遊人。無能得其畧。隴麥離離青。菜花黃焯焯。
潏水化平疇。老樹啼鴉鵲。倏忽發霾風。遍地走沙漠。
天豈禁遊人。而乃作狂虐。急爲賦曰歸。友生具杯杓。
感其情意慤。不復事推却。千里求友人。胡爲相扞格。

題詩以紀之。願言永酬酢。

激川八景

激渡秋遊

知縣 張崇樸

一泓秋水映高城。鼓棹閒遊晚鏡清。烟鎖平橋官柳
暗。風翻新漲戍樓橫。芰荷瓣老香初謝。鷗鷺眠酣夢
不驚。涼氣襲人真爽豁。夕陽歸艇晚霞明。

梧岡棲鳳

颺颺靈禽絕世姿。曾聞此地暫栖遲。
何事詢天老。循吏猶能招彩儀。彷彿如聞啄竹實。依稀還見踏
梧枝。雨

今恰值昇平日，佇看歸昌來應期。

銀杏蟠龍

鴨脚無枝老幹遒，不知經歷幾多秋。爭傳玉輦當時過，還看足痕今尚留。蟠曲不隨風雨萎，虬龍空與棟梁侔。金鑾去後無消息，存得枯枝說未休。

白帝清風

颯颯清飈古道中，當年澤畔滯英雄。揮蛇影斷青萍氣，逐鹿爭傳赤帝功。雲氣朝朝籠楚魄，劍光夜夜冷秦宮。等閒艷說前朝事，亭長還能歌大風。

焦岩晴烟

古刹陰陰萬木稠，將軍駐馬在高邱。烟光慘淡晴如暝，樹色蕭森夏亦秋。玉虎忽驚鼙鼓震，彩虹長似劍鋒留。不堪回憶當年事，烟水蒼茫荒草洲。

烏溝夜月

霽色溶溶入夜清，村臨水際柳如城。素蟾曳影秋容淡，珠露乍流蛩語輕。風動波搖天不定，林深鳥夢夜無驚。年來博得今宵靜，洗滌塵囂無限情。

章華遺址

雄風久矣誇三湘，又築章華浚水傍。百尺簷牙霄漢迥，幾行舞袖綺羅香。興豪謾逞通宵晏，腰細空憐餓

視粧惆悵落成緣底事祇今衰草對斜陽

荒城夕照

漠漠風光澹晚烟。餘暉斜挂綠楊邊。高城殘堞參差見。遠樹荒村斷續連。閒客坐來秋草地。倦禽歸去暮霞天。半規不必長繩繫。還有清光待夜圓。

烏溝夜月

教諭崔章

霽景輝良夜東郊紀勝遊。澄波光曳練。遠樹影橫秋。犬吠村邊寺人呼柳外樓。低徊不忍去。明月在通溝。

銀杏蟠龍

古刹何年樹枯枝猶未殘。鷺毛迎翠輦。鴨脚罩金鑿。

葆羽光堪憶足痕人共看。參天留黛色。千古說龍蟠。

澱渡秋遊

澱灩澄波靜乘閒買棹遊。綠搖新漲水。紅墜滿林秋。爽氣來襟袖清芬映藻洲。回船明月上。閒夢付沙鷗。

章華遺址

南風何太競此地起高臺。歌管凌霄迴。綺羅遍地裁。晏酣瓊作液腰細玉為腮。試看豪華地。惟餘土一堆。

梧岡棲鳳

訓導呂一敬

丹穴有靈鳥非梧定不棲。來儀澱水畔。覽德潁川西。循吏仁風播仙翰苞影低。當年棲止處。彷彿聽笙啼。

白帝清風

何處清風至颼颼任古今青萍寒夜月白帝葬秋林
四百開炎運三章散楚心偶來訪古道景物正蕭森
焦岩晴烟

古樹村邊寺氤氳野烟濃陰暗草色宿霧醉花妍
鞞鼓風中響旌旗柳外懸將軍駐馬處繚繞滿晴川
荒城夕照

荒城臨古道返照射餘輝雉堞明初燦樓臺影漸微
牧童驅犢返倦鳥帶霞歸不覺烟光暮山嵐冷浸衣

明倫堂咏菊

禹州州判攝商水縣典史事

程瀚

寒風凋百卉馥馥獨飛香影瘦初冬月枝披五夜霜
蕊珠含翠色瓣爲掇金黃夜靜看書罷餘芳散客床

其二

高人籬下物品望自清幽花萼全經凍孤芳直過秋
雪中香自傲圃晚節誰儔愛煞陶家景珍同玉樹留

梧桐樓鳳

邑副榜貢生

郭熙

彩儀久不下丹陽此地何因有鳳凰爭說來儀憑郡
守還緣聖主兆文章

荒城夕照

返照輝輝天氣清餘光高掛在荒城溪橋不盡幽人

興一縷殘霞報晚晴

章華遺址

澱川城北有高臺縹緲簷牙幾費猜歌管細腰消歇
盡夕陽惟見草成堆

白帝清風

炎歷初開雲氣收英雄仗劍恣萍遊當年夜泣白蛇
處古道蕭蕭起暮颿

澱渡秋遊

盈盈秋水繞高城緩棹中流浪不驚添得遊人無限
趣澄波倒照晚霞明

銀杏蟠龍

老樹曲蟠歲月多足痕猶自未消磨謾言鴨脚同樗
櫟曾得君王玉輦過

焦砦晴烟

雲樹參差淡晚烟不知駐馬在何年而今爲訪屯兵
處細柳盈盈漾綠天

烏溝夜月

一片清光水樹幽溶溶月色縱閑遊等閒識得商飈
意吹起蘆花兩岸秋

吳公堤

邑監生 陳大琰

沙流逶迤清且長上溯魯山下淮陽中間滙合褚水
滄更合汴流勢益張歲在甲辰苦淋浪黃波怒號決
宣房南來澎湃擬懷襄濁浪滔天勢莫當礧礧不辨
河與潢南堤蟻穴幾汪洋欲開不開民倉惶大聲疾
呼舉國狂賴有邑侯吳錢塘乍聞瞿然驚且傷單騎
疾馳危堤傍指撝堵築披星霜經旬勞悴心徬徨巋
然獨峙如山岡百川東之障一方登民衽席固金湯
羣黎歡呼誦鏘鏘爲勒貞珉鉅道旁堤名吳公誌不
忘吁嗟乎軼卓魯駕龔黃公等召伯堤甘棠後先千
古相頡頏

激水橋送別李明府

神君雅意邁清流德毓龍門敷政優才氣噌吰高更
遠宦情冷淡去難留一錢不入清風袖孤鶴遙隨明
月舟歸去玉函山下住東籬栽菊任優游

白帝清風

邑廩生趙理

青松颯颯商飈過總爲當年奮太阿老嫗呼來深夜
冷巨虺斷去寒芒多梧桐月照春無色楊柳風飄秋
起波幾變桑田炎漢古至今猶仰大風歌

烏溝夜月

一望清泓翠帶長靜宵芒射冰輪涼深灣近看仙娥

影幽谷遙聞丹桂香波盤玉鈎魚遊餌潭澄圓印壁
沉光誰將淨洗一天碧輝燭乾坤詎編商

章華遺址

靈王侈大逞雄才聳翠風光有故臺列國衣冠成古
話楚宮歌舞到今猜萋萋長拂河邊草馥馥時迎嶺
上梅南望長江流不盡幾同漢鑿昆明灰

梧桐棲鳳

激水湯湯連潁川鳳鳴奇蹟汗青傳重聽不易廉明
吏屢奏堪稱靈瑞天翹翹文明岐地運踰踰儀舞虞
廷絃而今值有葦萋樹爲賦卷阿詩一篇

過南頓懷古

邑恩貢生郭苞

偶尋名勝過南城風掃殘雲天氣晴問俗野老思聖
主聽音古寺慕神鉦徘徊昔日潛龍處慨想當年逐
鹿爭賜復深仁悵已矣孤城隱隱列旗旌

其二

葱葱嘉氣繞嘉城雲漢祥光照日晴天毓紫微掃彗
攬運歸赤帝震神鉦龍飛天上羣思附鹿逐中原誰
與爭昔日霸圖何處是勳留竹帛善留旌

吳公堤

邑廩膳生李雲斐龍章

河上神明宰如公有幾人安瀾昭景運砥柱伏波臣

一邑恩膏渥千年謳頌頻鴻猷銀管勒取次入楓宸
臥龍橋送別胡明府

清名常共憶川流未許人知莫謾投書換鷺籠池俱
黑吟成雪影句還留人歸甌閩千山月花滿河陽百
里洲遺愛從今思叔子淒淒忍向峴山遊

送別王明府

邑監生 李 洪

帝里名賢聲價芳來從百里試青箱月臨高閣冰絃
靜花落空堦鶴夢香照胆羣欽人是鏡懸魚共羨節
如霜陽春有脚留不住到處桑麻盡是棠

八景詩

白帝清風

邑庠生 陳大琳 崑圃

曾聞白帝子當道此獬豸一劍功成巨千秋風尚清
問途俠氣在懷古詩魂驚颯颯翻楓葉如聞姬泣聲
焦若晴烟

將軍息馬地烟景望中生本是浮屠寺翻疑細柳營
野雲若爲護飛鳥過頻驚怪得林泉暗烟霞欲妬晴
激渡秋遊

爲愛波光好乘閒鼓棹遊水將天一色舸共鷺雙浮
蘆綻白雪影風翻紅蓼秋晚來歸路穩落日滿航舟
銀杏蟠龍

葆羽何年過真人驪蹕宮雖言枯木在不與死灰同
鳴脚難留影龍旗望竟空幾回思往事翹首問秋風
烏溝夜月

聞說赤符裔會從此夜過路迷天乍晦雲淨月偏多
岸柳搖清影林風皺綠波水輪如有意萬里照山河
荒城夕照

百雉流風在城邊草木荒暮雲封斷碣殘堞掛斜陽
鳥倦歸飛急人添吟興長寒烟迷古道歸去晚風涼
章華遺址

章華名勝地方漢有高臺羅綺空中見弦歌雲際來
落成誇衆國圖伯陵中垓今日過遺址雄風安在哉
梧桐棲鳳

靈鳥出丹麓胡爲鳴潁川高梧堪托足太守若爲賢
噦聲今已邈芳踪此尚傳曠懷千古事重見在何年

梧桐棲鳳

邑監生

王夢桃

地據浚川曲中央有鳳臺靈禽隨化至仙鳥兆祥來
郡守文明啟皇家太運開彩儀應未遠遺蹟幾徘徊
銀杏蟠龍

當年榮盛日繁果墜金鈴鑾輿久無跡龍蟠尚有形
足痕映日碧鐵櫺插天青留得枯枝在千秋可誌銘

澱渡秋遊

放棹綠波裏盪搖
金盞驚宿鷺水面起浮鷗
風捲蘆花白霜凋楓葉秋情深夕眺晚落日滿航舟
章華遺址

高臺映北郭共道楚風奢遙想綺羅隊空留翠柳遮
細腰消粉黛繁響散雲霞試問落成者深林噪暮鴉

吳公堤

吳公堤上月娟娟吳公堤下水潺潺公心如月又如
水長在千年與萬年

隱川書院

宮墻門外對高城綠水溶溶晚鏡清地僻不容塵跡
到堂閒惟有讀書聲荷香入座添琴韻柳影當階聽
鳥鳴自是羣賢樂道處文光夜燭斗牛橫

和程父臺明倫堂咏菊原韻

邑廩生

王伯學

彥博

瀟洒籬邊菊乘秋弄晚香幽姿迷淡月冷艷鬪新霜
入酒杯生韻拂人袂欲黃不知陶處士幾度醉藜床

其二

雅致披三徑豈同凡卉幽寒香偏浥露佳色祇宜秋
送酒人安在哦詩句莫儔孤芳與雪調聲價應同留

商水縣志卷之八

銀杏蟠龍

縣尉駱光麟

一株銀杏擬蒼松
鬱鬱虬枝茂幾重
已喜書臺翔彩鳳
旋傳喬木護蟠龍
停車此日方尋跡
駐節當年舊有踪
老幹不隨風雨謝
何須泰岱訪雲封

前題

學士李富元

古木凌霄迥怡情
野外看蒼梧瞻鳳
集銀杏訝龍蟠
芳躅痕猶在征塵
迹已殘金枝鱗角
聳鐵幹爪牙攢
露滴珠含彩雲歸
氣幽盤躍隨風雨
勁潛耐雪霜寒
此日環車轍當年
解馬鞍地同淇澳
韻清意拔檀藥
梧岡棲鳳

學士李富元

商水縣志 卷之八
卷阿載咏鳳鳴岡應瑞曾來頴水傍音叶九成諧律
呂色攢五彩煥文章當年賢守仁聲遠萬古循良姓
字芳爲覺德輝千仞下梧埤棲處是甘棠

前題

武進士李鍾瑛

高岡行處望嘉樹正萋萋銀杏疑龍繞蒼梧看鳳棲
祥徵淮水北道協頴川西爲喜朝陽麗應嫌井畔低
九苞符瑞靄五彩映雲霓不屑乘軒鶴何論舞鏡鷄
丹山原有種紫閣許誰栖鳴盛和聲遠先生木乙藜
白帝清風

武進士李鍾瑛

西時曾傳白帝名羣雄角逐苦相爭幽關未肅三章

約頴水先聽一劍鳴豪氣當年虹彩壯寒風此日野
雲橫廢興往寧今何在萬古河梁慶永清

烏溝夜月

思貢王景相

烟樹迷離景色幽閒來乘興問烏溝心清無事三庚
守月皎何妨五夜遊策馬曾聞開朗照飛鳧恰好趁
晴秋文思對此應添爽雅有高吟上庾樓

前題

郊外明如晝携朋兩夜遊風清聞白帝月皎映烏溝
素彩連澗渡寒光接頴流林深巢宿鳥浪細汎浮鷗
琴韻閒中聆警聲靜裡收鳳曾儀九德雉已淨三洲

逸興追開府嘉賓繼子由無魚休鼓缺垂鈞理扁舟
焦岩晴煙

生葉方治

煙榮焦岩望迷離屯守應深未雨思霧捲雲開和會
後風柔日麗泰交時霞橫練影旋旂展樹起秋聲憶
馬馳幾度夕陽懷古意傾聽好鳥韻高枝

前題

康姓陸清士

繚繞晴光映遠天英奇彷彿憶當年雲橫古岩狼烽
靖練掛長空樹色連曉愛朝暉籠宿霧晚看返照捲
輕煙成平百載兵戈息花凋東風聽鳥喧

章華遺址

增生李松筠

臺築章華欲壯威當年陡起勢崔巍龍橋已結飛鴻
陣虹道空餘漢斗輝惟見嚮歌諧巷舞不聞玉管與
金徽楚靈杯土今何在弔古深情寄詠歸

荒城夕照

生員李先基

空際飛霞任捲舒荒城弔古幾躊躇迷離津樹遺踪
魏錯落斜陽返照餘薄暮晴光輝蘼岸遙天烟景靄
村墟憑高眺望峯回影爭道溪山畫不如

澱渡秋遊

生員王成章

澱水澄波一色秋扁舟輕渡暫遨遊香飄荷渚蘭生
岸光映沙汀月滿樓繞郭風清來爽氣橫橋烟鎖見

寒流伊人何處深
涵湖宛在中央上下求

前題

生員張琮

露白葭蒼澱渡秋年豐事減吏民遊藕花色映金城
麗漁唱聲隨錦浪浮分韻題詩頻喚酒垂綸賭釣數
移舟夕陽西下烟村晚皓月當空爲少留

银杏蟠龍

監生王之樞

银杏何人植層層翠色重高岡瞻集鳳古木擬蟠龍
矯變原無迹潛身似可踪凌風驚電繞帶雨訝雲從
激水澄波映烏溝皓魄濃葉常沾瑞露柯不改嚴冬
駐蹕當年事停驂此日逢甘棠同志愛寧羨五株封

烏溝夜月

監生王相

皓月清輝迥烏溝夜景新祥煙浮玉鏡瑞氣繞冰輪
皎潔消蒙翳清高絕點塵芳芬香滿桂錯落影隨人
朗徹激川外光流潁水濱遙吟情自暢懷古意無垠
鷗靜平依岸鳧飛遠渡津東郊尋勝績遊賞及良辰
遇蒙恬塚

監生王端

兔毫始造志芳名北守藩籬績未成澱水城南存故
址茫茫賚恨望長城

過耿弇墓

監生李瑀

襲封好時近扶風荒塚綠何傍潁東銅篆不須留姓

字還從建武緬奇功

楚懷王墓

監生李廷慶

城西古塚最淒涼
曾讀殘碑憶楚王
假使忠言能見
信孤魂何至弔激疆

扶蘓塚

監生王 綿

同胞兄弟忍相殘
秦楚交爭獨立難
遺恨不隨風雨
謝愴懷往事幾盤桓

范臺懷古

監生王 紋

西南望范臺高賢存故址
戮力吞勾吳奇勛標青史
盛名難久居富貴無窮已
浮海變姓名自號鴟夷子
扁舟泛五湖遺踪傍激水
寶玉奚足珍致產聊復爾
波光萬頃碧澄懷正相似
湖泗緬伊人耿耿切仰止

大王庄

監生 李名錫

邑有大王庄靈蹟存故土
修行得薪傳護法佐真武
不二妙法門澄心參佛祖
金橋七十二白玉闌杆豎
梓里湖淵源激疆賴鎮撫
威靈遍寰區英風冠千古

時曲

監生 李景聲

商九縣志 卷之八
澗水洄瀾處盈盈一曲流探源何處是濯足任相投
西近牛頭寨東隣馬驛溝元和留舊蹟洄溯仰前猷
乾谿臺

監生 李辰樞

邑界淮蔡間春秋盡屬楚舊有乾谿臺靈玉遊觀所
恒舞亦酣歌朝夕相燕處章華築既成叢臺復再舉
齊雲並落星經寒又歷暑土木嘆煩興千秋傷禾黍
鑒古規後人殷勤爲寄語驕侈不足思積德綿令緒

叢臺懷古

監生 李樹祥

章華遺蹟在相映有叢臺欲壯河梁色曾將錦繡堆
綺羅成蔓草松柏蔭蒼苔豪勝歸何處憑高思遠哉

